

Ut is de vader van de Prins geluktj oom oze
kairtjescontroleur te bezeike. Veur de gooj
orde oomdet wai ut neet in kleur aaf koonne drukke:
allebei de kairtjes wore van dezelfdje kleur blauw.
Sjang proficiat mer det hoofse neet mieër te
prebere! Jantje joamer, doe moos noe mer prebere
oom Sjang truk te pakke.

ECHT

ENTREEKAART BONTE OVUNDJ

C.V. „DE MOEREBUUK”

7.00

EBRUARI

VALS

oud IJZER


Wij betalen de hoogste prijs voor rood-koper,
geel-koper, brons, aluminium, accu's, roestvrij-
staal, zink, lood en oud ijzer.

**Tel. 04744 - 1473
of 04490 - 22798**

Groensebos 17 - Montfort

DE KWAKEL

K
W
A
K
E
L



Moeëre en Moeërinne,

Names mien vrouw en michzelf wil ich edereen bedanke veur ut entoesiasme woëmet wai toet noe toe euveral zeen oontvange en begroetj. Wai hope det wai ut vertroewe det gai in oos hubtj waar koonne make. Nateurlik wil ich miene veurganger Prins Hub II en Prinses Leny bedanke veur de geweldjige meneer woëop zie ut veurig joar de Carnaval hubbe geleidj. Det zal veur mich ein veurbieëldj zeen. Verder dank ich de Road veur heur vertroewe en veur de steun dai ich toet noe toe hub gatj. Loat oos dit jubileumjoar van de Moeërebuuk aafsloete met einige fantastische carnavalsdaag oonger mien motto:

Met Prins Ton veurop

Steit hieël Ell op zien kop! Alaaf!

Prins Ton I

Prinses Maria.

Vanne redaktie:

Minse, excuus veur ut feit det de teikeninge dit joar achterwege zeen gebleve. Sorry det de accente in dees Kwakel get anges ligge.

Door oomstandigheden waas ut neet meugelik ut anges te doen en waas de redaktie oetgedundj toet eine man. Wai hope volgendj joar op aanvulling.

Moeërebuuk en Moeërinnekes,

Aan eine kantj is ut joamer mer aan de angere kantj ben ich blie det ich de taak van de Prins euver hub koonne gaive aan Prins Ton I. Joamer oomdet ut veur mien vrouw, kinjer en michzelf ein oonvergaitelik joar is gewaistj; blie, oomdet alles zoë good geloupe heet en oomdet wai wete det de carnaval in Ell zoë laiftj. Eder joar opnoew zulle wai der weer noa oetkieke zeker noe de Road mich toet adjudant van de Prins heet benumdj.

Wai winse de noewe Prins net zoeëveul plezeer, zien Prinses aiveveul lol en wai gluive det ut volgendje motto in oos herinnering kan blieve:

Met Hub van Sjir as regent

Waas in 1984 hopelik edereen content!

Alaaf! Oad-prins Hub II

Prinses Leny, Monique, Rob

Moeërebuuk,

Wai hubbe oos jubileumjoar toet noe toe met veul euvertuging noa boete koonne bringe. Zurgtj met de vastloavesdaag veur ein gooj aafsloeting van dit seizoen en steuntj Prins Ton I en Prinses Maria wiedjer oos Prinse al joare hubtj gesteundj. Names de Moeërbuuk: eine gooje vasteloavendj!

Vorst Jan

Optochtroute

Opstelle oppe Kampstroat bie de burdjes die Harrie Sieben doa nieërzetj en opruimtj. Leefst via de Busstroat oom zoëdet doorgoandj verkieër richting Kelpe zoe weinig meugelik last heet.

Start 14.00: Sebastiaanstraat- Niesstraat- achter ut kerkhof links euver ut paidje noa Meuleveldj (Jan Verstappen zal hopelik dai pol deroet hubbe gehooldj veurdet de Prinsewage doa is). Breederkamp- Swartbroekstraat- Meidoornstraat (woë veurig joar die buim in eine kieër bove de weeg veul kaler wore) Magnoliastraat- Seringenstraat- Scheyvenstraat- weer Niesstraat- Sebastiaanstraat en achter de boondj oontbinje. Wildjer astebleef gein auto's oppe weeg zette woe de optocht langs moot kome.

Ut Optochtcomité
(Tjeu van Hoke, Hein
van Seunis, Jantje van
Meerte, Paul de Bock)

Neet mieër in stumming

Eine gezoondje Ellerjoong waas ins eine oavendj met zien maidje eurges op bezeuk. Ein stukske later oppen oavendj ging hai same met ziene schat op heives aan mer den waal met de bedoeling oom ins lekker bie det maidje thoes te goan vrieje. De oajers wore toch neet thoes. Ut is woarsjienlik det det al dekker waas gebeurdj en det de lol der get aaf waas, want oongerweges zeet dai joong: Wetse waat? Woeëroom ieëst nog det hieël stuk riejje? Wai koonne de wage auch waal eurges naive de weeg zette of sjoeëner noch in ein landjweegske parkere. En det waas good. Noe haaj ut in dain tiëd flink geraingeldj, zoëdet det weegske eine groëte modderpool waas gewore. Wie die twieë doa achter kwome sting de wage der al middenin. Moos det maidje auch nog deroet oom de wage los te duuje want gewoën ging der ter neet oet. Det heet eine hieële tiëd ge-doordj veurdet ze, met zeiknaate puët, aan thoes wore. Erme Edith! As det oongertusse mer is goodgemaaktj want dai zelfdje oavendj waas heur de zin waal euver wie de joong oos heet verteldj.

11 joar Eutjes

De Eutjes haje ut al aangekondigdj in Ut Kanton van Wieërt en ut Kontaktblaad: ze zoeëje ein receptie hoaje. Det haje ze auch good veurbereidj en oppe Boontje Oavendj moke ze alle minse nog ins dudelik waat de bedoeling waas. De meiste Eutjes wore den auch noa de Boontje Oavendj snel noa hoes en, achteraaft gezeen, is det mer good gewaistj want ze wore sangerendaags good bie de tiëd. Wai zulle de minse die neet alles dervanaaf weite efkes loate wete waat der allemoal is gebeurdj. Oom 10 oor sunjesmurges wairdje der hëste gegaite bie de Prairie. Roondj kwart veur elf waas Bërke heure vaste chauffeur doa oom de Eutjes in triomftocht roondj te riejje door Ell. Joamer genoeg haje veul minse det neet in de gate oomdet ze of op heur nest loge of in de kerk zote. Later verteldje Marieke nog tegen Leen (die waas helaas verhinjerdj mer beldje oonger de receptie efkes op) det de bus vast haaj gezaite in ut slamkuulke mer det waas aan de bus neet te zeen. Misjien waal aan de zakdeuk. Tege elf oor kwaam de bus aan bie Tjeu: eine sjoeëne ieëreboog van bezems en trekkers stoong kloar want die vanne Road wore efkes gestoptj met de zaal poetse. Binne haaj de fenclub al veur sfeer gezurgdj en Jo van Beurskes winsdje de Eutjes proficiat. Effe later kwome alle Boontje Oavendjartieste binne, de kapel

veurop en doa wairdje toen ein speciaal gearrangeerdj leedje gezoonge of gekwaaktj. Get later oppendaag kwaam de Road binne want die haje veul werk gatj met de rotzooj op te rume ofwaal ze haje mieër koffiegedroonke as gewerktj, det kan auch. Ze kwome in alle geval op wie ein stelletje losgeloate Indiane. Inkele muzikante vanne kapel zurgdje veur de ritmische biggeleiding. Det veel good in de smaak want Betje kloeëdje die van de Road en leet ze nog eine kieër draan. Veul Eller en Kelper minse kwome feliciteren, voetballers get later. In de middig brachte de Eutjes nog get fragmente van heur oaj stukke ten gehuëre en wairdje de film gedreitj. Ut waas ofs ze ut veur de ieëste kieër brachte. Ut waas net Carnaval. Laterhair zeen der zteeds mieër minse gek goan doan mer toen zeen die van de redactie heives gegange oomdet ze ut neet good meer zoge zitte.

Eine gooje kok

Eine kok kwaam in ein restaurant solliciteren.

Zeet de baas: Kinse koke?

De kok: Joa, op allebei de menere.

De baas: Wieszoe op allebei de menere?

De kok: Ich kan zoe koke de de minse truk kome mer auch det ze neet mieër truk kome.

PRIESVROAG

Waat koupe wai woë in Ell?

Gai wetj allemoal det wai oppen tillevisie zitte met ein reclameprobleem. Steltj euch ins veur det det veur de Kwakel auch teldje. Den zoëje wai det op de volgendje meneer oplosse.

Gai vindj hie oonger eine liest van artikele. De vraag doabie is: Woë in Ell konne wai dees artikel koupe? of Woë in Ell of door weem konne wai det loate doon? Oplossinge zoë snel meugelik insteure noa Prins Ton. Winnaar is degene dai

- a. alle artikele in Ell kuintj
- b. doabie de meeste plaatse in Ell heet aange-
gaive woë det det gekochtj kan waire.

Dinktj der ins euer noa, joa?

- | | | |
|------------|-------------------|---------------------|
| 1.eier | 11. druëgstukskes | 21. sliepse |
| 2.super | 12. leechtsjoow | 22. barbecuevleis |
| 3.kieës | 13. meiskneuze | 23. champignons |
| 4.zult | 14. alabastine | 24. hypotiëk |
| 5.negel | 15. deure | 25. piepkukes |
| 6.asperges | 16. conifere | 26. permenent |
| 7.stevele | 17. gladiolen | 27. goochele |
| 8.erpel | 18. fietsebel | 28. hagel |
| 9.kuël | 19. vaat beer | 29. krintebul |
| 10.appele | 20. blome | 30. werm frikedelle |

Halfvasteoptocht

Veurig joar meindje eine hieële groeëte houp minse detter ein 1-aprilmoop waas georganiseerdj. Doa zoëj bie j Nol (toen nog) eine halfvasteoptocht waire gehoeje soonger wages en allein veur groepe, minse allein en zate hermeniekes. Toch wore der nog behuërliek get minse op aaf gekome want ut waas gein aprilmoop. De start waas zoë good bevalle det beslote is oom deze optocht dit joar oppe zellfdje meneer weer roondj te loate trekke. De Road waas veurig joar bereidj oom met de organisatie te helpe en duit det noe auch. De alternatieve road geit door zoë hubbe wai van vorst Piet gehuërtj. Trouwens vorst Piet is nog liëlik lestig gewaistj det de alternatieve road gein oetnuëdiginge haaj gekrege veur de receptie van ut jubileum van de Moeërebuuk. Die vanne Road hubbe hum toen gezagdj det der mieër minse (al of neet met opzet) vergaite wore mer det ze ut toch sjoeën voonje det ze aivegood oppe receptie wore. Waat mooste ze anges auch zegge? Vorst Piet heet oos auch gezagdj det ut zeuke noa eine alternatieve prins en prinses al in ut deepste geheim aanne gang is. De route weurdj neet zoë lank wie de gewuëne optocht. 14.00 oor vertrekke bie de Prairie-Sebastiaanstraat-plein-Niesstraat-Sjeivestroat-Ribes-Jasmijn-Weigelia-Meidoorn-Magnolia-Seringestroat-Prairie.

Eine noewe auto

Harrie haaj veur zien vrouw en ein bietje veur zien eige eine noewe auto gekochtj. Veur de verandering haaj der ein anger kleur oetgezochtj. Den auto waas noe neet mieër greun mer crèmechtig. Ut ieëste weekend det hai hum haaj moest hai neteurlik drek met dai auto noa de café. Waat hub ich aan eine noeëwe auto as anger minse det neet op slaag zeen? Get later oppen oavendj, wie dai kal euver den auto alweer get euver waas, luiptj Harrie noa boete en struintj de hieël parkeerplaats aaf op zeuk noa ziene auto. En hai zocht en zocht mer doa stoong geine eine auto dai auch mer ein bietje op eine greune leek. Harrie weer noa binne: Verdomme ze hebbe miene wage weggehaaldj! Mer joong, kreeg ter derop te huëre, Kiek doa! Hai steit hie toch net veur de deur! Och, des woar auch ich heb eine noewe joa, zag Harrie toen. Aan ut buffet kloont toen auch nog: Aup mien bein! (Later is gebleke det Harrie det met opzet haaj gedoan oom de kal euver ziene noewe wage weer aanne gang te kriege, mer den kalle wai waal euver ein half joar later).

Sleuteleuverdracht door de burgemeister

Dit joar veur ut veerdje joar zal burgemeister Cortenraad aan de Prinse van de carnavalsvereniginge vanne gemeindje de sleutel oetreike veur de Carnaval woemet van vreuger oet aangegaive weurdj det veur drie daag de Prinse de scepter moge zweije euver de durpe en de bewoëners. Same met de anger vereniginge en de burgemeister is ut volgendje programma gemaaktj. ALLE inwoëners van Elle en oomstreke were genuëdj oom te kome kieke, loestere, zinge, ein putje te drinke et te zeivere. Programma zoaterdag 16 februari

Jeugd: 14.45 oor: Alle jeugdroaden/prinsen/prinsessen zeen met de burgemeister bie de Prairie.

Optocht noa Ellenhof.

15.00 oor: Welkomswoord organiserendje vereniging. Ceremonie door dhr. Cortenraad. Optraije jeugdartisten. Herinnering veur oad-prinse. Hosse.

16.30 oor: sloeting.

Groeëte: 19.30 oor: Alle vereniginge zeen verdeildj euver de Eller cafés. Ze waire binnegehooldj door de diverse kapelle (Ell-Hunsel-Ittervoort)

20.00 oor: Ederein is in ut gemeinsjapshoes en weurdj welkom geheite door de vorst. Ceremonie door de burgemeister woëbie hai de gewuëndje heet oom de Prinse der flink

tusse te pakke. Mer de Prinse zeen meistal
auch neet vies dervan oom get truk te zegge.
Herinnering aan oat-prinse en dansgroepkes.
Noa ut officiële gedeiltje same fieëst.

Wai hope det gai durftj te kome en winse ederein
eine plezerige oavendj.

Verdere activiteiten met die daag:

Zunjigoavendj: roondjtrekke Road met kapel langs
alle cafés. Sloete: Bachelor Club

Moondjig: optocht.

's oaves priesoetreiking optocht
in gemeenschapshuis Ellenhof.

Doanao roondjtrekke langs alle cafés
Sloete: de Prairie

Dinsdig: Roondjtrekke langs de cafés.

Sloete: Bellekes.

Woonsdig: Hieëringe doorspeule.

Ich troew ut neet

Eine boor kumtj bie den dokter. Zeet de dokter:

'Zoeëtse dich neet tege de griep in loate ente?'

Zeet dai boor: 'Nou, doa moot ich ins euver noadinke.

Miene buurman heet det veurig joar auch gedoan en
dai is toen gestorve. Wie der oonger den trakter
is gekome'.

MEULEVELDJ II

Waat oos te wachte steit

- De optocht zal alweer get langer waire.
- Ut buurtvoetbaltoernooj zal alweer oetgebrijd
mote waire.
- Doa zal mote waire bekeke welke noe stroate de
Antoniusstroat met ut buurtvoetbaltoernooj zulle
goan helpe.
- (Oppe Boontje Oavendj gehuërdj) Joske en Toos
zulle ut bedrief mote goan verplaatse oomdet
de bank oet geit breije.
- De recreatiemeugelikheden van de jeugd zulle
waire oetgebrijd met ein fiets- en ein motor-
crossbaan. Ein autocrossbaan is neet nuëdig
zoelang ut flink snietj en vruustj. Veur ut
oploate van vliegers en vleegetuge zal ein park
waire aangelagdj: ut jumbo jettenpark.
- Doa kumtj noa auch ut ieëste buurtleedje. De kapel
kintj de melodie al speule en Karin en Willemien
kinne det leedje auch. Allein de tekst hoeftj
mer te waire verangerdj. De titel weurdj:
"Vallendje Baile".
- De heemkundevereiniging zal verdomdje veul mote
vergadere euver de stroatname. Wai zulle heur
noe al vast get helpe met de volgendje ideeje:
Broekerbeemd (of is det neet origineel genoeg
mieer?'), Vijverdal, Weerbroeksgracht, Kogellaan,

Aspergespaadje, Oude Strontboulevard, Sint Maartenspleintje (det de sintemertehoup aivegood verstooktj kan waire), Kerkhofsingel, Lindenhofje, Brouwers Betje Boulevard (te eupene door ein vanne Eutjes), Avenue des Belges, Lange Broekweg, Korte Broekweg, Onder Broekweg of Onderbroek Weg.

-Bie Linje kumtj eine handjwiezer te stoan noa RECREATIE- EN WANDELPARK 'De Wetselderbergen' (Ingang Kortebroek Weg) en verder burdjes met de slogan: Wie 's zomers kan zwemmen kan 's winters ook schaatsen. Verder nog ein reclamebord: Versnaperingen geleverd door A.Vanti.

Ein minselike vergissing:

Eine mins kumtj eine derewinkel binne woe ze speciaal ape verkoupe. Steit doa eine joonge vent dai pas verkuiper waas en de mins derop aaf:

- Ich zoeëj gair eine aap wille hubbe.

Lieëtj de verkuiper hum ein hieël serie opgezatte ape zeen, groeëte, klein, dikke, dunne...

- Nai, zeet de mins, ich haaj gair eine laivendjel! Toen de verkuiper noa achter: 'Hei baas, ze mote euch hubbe...'

Trukblik Boontje Oavendje 1985

In aafwieking van anger joare wille wai in dees aaflevering vanne Kwakel get mieër aandacht besteje aan de Boontje Oavendj. Ut is neet de bedoeling oom minse op te hemele of aaf te krake, det dootj gai allemoal zelf mer; ut is allein de bedoeling oom de nummers nog ins op te numme met de derbie huërendje arieste. Ieëst nog ut publiek. Det treutj zoegezagd neet op mer is waal doa. En trouwes soonger publiek is ter volges de artieste zelf niks aan. Vriedig waas de zaal neet gans vol, zoaterdig waas ut stampedruk. Det wirktj auch door op de artieste. Minse, probeertj volgendj joar twieë vol zale te kriege den goan de artieste de nog helder tegenaan.

1. W. Niëns en Marian van Alber (debutante) opendje de riej van optraijes. Normaal gesproke neet gemakkelik mer veur heur in de Boemeliër waas det ein makkie.
2. Twieë debutanten: Esther van Bekkers-Sjeng en Peter van Nol kwome bie dokter Erik Wulms. Die speuldje zoe vlot weg det we noe al koonne zegge det dees speulers volgendj joar weer met doen.
3. Matje van Glabbeek en Jos van Lemme kriege met rake opmerkinge oet 2007 (5x11) de lachers op heur handj. Auch vanwege heur opvallendje kostuums.
4. De mislukdje heilgymnastiek van Mia van Glabbeek en May van Lowie veel good in d'aird. De radioteksten droge doa toe bie ('Det dach ich').

5. Vriedig neet mer zoaterdag des te helder ginge
Truu en Truu noa Paries. Nel Deckers, Toos Heykers
en Sof Steyvers speuldje Hollenjers in Paries
woe ze ut meiste neet en veul verkieërdj verstinge.
6. De Ellenthaler Musikanten zurgdje doanoa veur
eine zeer gevarieerdje, spectaculaire en muzikale
sjoow. Gooi solisten trouwes auch: Marleen Peeters,
Cleo Janssen, Edward Heykers en Fer Koolen.
7. Eine mins wiltj op eine Boontje Oavendj auch waal
ins get anges kwis met Peet Seerden, Mathijs van
Brunester Piet, Thijs Peeters, Jan van Helma, en
Witte van Wulms. Zeer gevatte teksten en leuk oet-
gewerkdje details met as hoeëgtepuntj de marmotten-
race.
8. W. Niëns haaj gewedj det hai eine buut zoeëj doen.
Veur ein vaat beer. Dai van Cnoops waas hum neet
good genoeg en doaroom sjreef der der zelf mer
eine. Petje aaf Wiell!
9. Veur de elfdje kieër Eutjes. De name hove wai
hopelik neet te gaive want anges mootj gai euch
sjame. Ze wore weer doa met heure zeiver en woord-
speulinge (Gai meintj waal det ich gek ben.- Joa
Tina, det meindje wai auch).
10. De Dubbelnon met Mia van Glabbeek, Toos Heykers,
Annelies Niëns, Sof Steyvers en May Voermans.
Waat ein kustelik geknoeëj.
11. Jos van Lemme en Matje van Glabbeek met de misluk-
dje repetitie met Peet Seerden (vr) en José van
Miet (zoa) as regisseur. Ein stuk det ut good

deej. Prima.

12. Ter aafsloeting Fer van Linje met typetjes,
grappige teksten, imitaties, en ein paar serieus
accentjes (Bedink ins op muziek van Imagine van
John Lennon).

Restj nog te neume de sfeervolie oomlieësting:

de noewe opzet van de Bühne; de rol van de Ellenthaler
Musikanten boet heur eige optraije; de vlotte en
verrassendje presentatie van Stef van Lemme, de
techniek van Hub van Lute, Mart van Stiene en Peet
van Seerden, de Bühneverzorging door Thijs Peeters,
Harrie Seerden en Lowie Voermans; en de man dai moos
zurge det artieste en aanhang neet oomkwome van
de dorst en de zenuwe; Cor Tunissen.

ut grimeerwerk van Karien van
Huyskens det heet loate zeen det ze auch nog get
anges kintj as sjoeën teikene.

Obers, minse achter tap, aan de entree en de bonne.
Stille werkers mer o zo hel nuëdig. Allemaal hope
wai met ut publiek: toet volgendj joar!

Wistj gai al:

- det ze met kiene in Ellenhof good koons verdene
- det de plaats van Hokster Koeëba altiet ut ieëst bezatte is
- det de zaal ut wermste waas wie der de minste minse wore en ut 20 graden vroom
- det Cor oeëts te hevig is met de nummerkes truk te doon inne meule
- det Cor bang waas det ut veul geldj zoej koste wie de meister truk waas oet Amerika: stel hai haaj de prieze in plaats van in guldjes in dollars aafgerope
- det José en Piër nog altiet sjinke luste mer det ze der de volgendje kiër waal get mieër vleis aan woeëje hubbe
- det Elly met rauw gehaktjbel goeëtj: op José
- det ze as frikkedelleverkouper bie de voetbalclub alle tale moos spraike
- det ut de voetbalclub dees coompetitie good geit en detter noe al hieël veul speulers meine det traine neet mieër nuëdig is
- det de voetbalclub noe auch ein kantien in Swartbrook heet
- det Jan van Palme pas get zeet as hum get gevraagdj weurdj
- det Hub van Lute ein noe touw heet mote koupe oom oppe Boontje Oavendj de lampe bove te kriege

- detter groët versjil is in blonne en det ze. ein gegaive blon neet te hel op moos bloaze
- det de Eutjes oppe receptie koste keze oet broeëd met huidkieës, broeëd met huidvleis en broeëd met zult
- detter weer veul is ingebroke aafgeloupe joar en det ze ut doobie veural gemuntj haaje op videoos
- det ut versjillendje vereiniginge good geit: de tennisclub heet ein noew kleidlokaal, de beugelclub ein spiksplintjernoew euverdekdje beugelbaan en det de pries van ut oad pepeer auch nog steeds oomhoëg geit
- det Ron van Miet ut tegooi aanpaktj: hai geit met drie vroulje tegeliek op stap auch al moot hai den zelf spa drinke
- det de tiëd van Pinkpop is verangerdj in Joetoe
- det ze flink herrie koons kriege euver ut aafzaige van buim
- det veul minse in Elle noew bure hubbe gekrege
- det de Prins al drek ein fenclub haaj
- det sommige minse verdomtdj groëte risico's durve te neume asse de 12½ joarige broeloft twieë daag te vreug vere
- det Trucker Joë blie waas wie dit joar de Boontje Oavendje soonger oongelukke veurbie wore

- det ze in de Prairie aanhangkerkes euverdektj
koonse parkere
- det ut rolle inne snié neet allein door
klein joong weurdj gedoan
- det euverhummes tegewoordig waal neet erg deur
mieër zeen
- det Hub van Sjr den ieëste Prins waas dai ins
get gewonne heet
- det naamgenote doadoor ein vaat beer koonne
verleze
- det ut met de kermis druk waas (op plaatse)
- det de operette van Avanti sjoeën waas mer
verrekdje veul zweit en meute heet gekostj (f)
- det in 1984 in Ell 4 vereniginge ein jubileum
hubbe geveerdj
- det Nol en Idy neet zoë lang, mer volges heur
eige nog te lang oet Ell weg zeen gewaistj
- det ze met kratse neet altied de verf vanne
roete aaf kriegs en doaroom waal ein noew roet
derin zuls mote zette
- det piekskes goeëje erg populair, nai ein rage
is gewore veural oomdet die kasteleins der
zelf neet veul van koonne (KP)
- det beugele veulmieër ein nachtsport is
- det der kairtjes zeen die nog sneller euver
de wereldj goan as ein blon
- det Australië veur ein blon erg wiet weg is mer
veur ein kairtje neet

- det der minse zeen die dinke det ze good geheimpjes
koonne beware (of neet Miek en Erik?)
- det berouw pas kumtj as de pries der al is
(hè Miek?)
- det der weer get inne lucht hingtj (pas mer op Erik)
- det ut Prins roaje dit joar verrassendje
winnaars heet opgeleverdj: proficiat Mia Seerden
en meister Henkens
- det der in Ell baiter gestruitj is gewore as
in Hunsel, Ittervoort en Itter en det det zich
auch zoe huértj: merci Jan
- det ut dudelik waas det oppe weeg baiter snieë
geruimdj is gewore as oppe trottoirs
- det ut werm water inne gymzaal nog steeds snel
op is
- det Cor met volleyen op beslissendje momente
veur ut net kan vesse
- det Piër van Berbe leedjes zingtj veur de
bejaarden en nog gein slecht auch neet (die
leedjes den)
- det der aafgeloupe joare veul minse aanne kneuk
zeen geopereerdj en veural aan de knieje
- det eine wintjer met veul snieë niks is veur
minse die met krukke loupe
- det de Prinsewage al joars sneller weurdj aafgebroke
oomdet steeds mieër negel door de gater valle
- det ze bie Schroën nogal ins verkieërdj ver-
boonje koonse zeen

-det Meuleveldj veurig joar noa de priesoet-
reiking neet mer noe in eine kieër weer waal
aan de optocht met zal doon

-det der oppe Boontje Oavendj veul reklaam is
gemaaktj veur gezondj (hè Jan) en lekker
aite (hè John)

-det waat in ut vaat zitj neet verzoortj:
of neet den Mia en Paula?

-det Tjeu en Mien doa neet veur oonger hove
te doon

-det ze asse achter ut net ves, toch nog beet
koons hubbe of neet Matje?

-det de bore dit aafgeloupe joar oontiegelik
aafgezeen hubbe

-det noe neet allein de meis en de krotte mer
auch de machines erg deur zeen gewore

Goje road veur doehetzelvers

Hubtj gai zelf aan thoes auch oeëts ein gaat
inne moor mote bore? Joa? Den waitj gai auch det
ze doaveur leefst met twiëje moos zeen. Eine veur
te bore en eine veur de stofzuigerslang vast te
hoaje. Meistal is ut zoë det de mins ut boor-
mesjien vastheet en de vrouw de slang. Det is
allemoal sjoeën en aardig, mer gai hubtj der
waal neet veul aan as degene dai met de slang
oomhoeëg steit neet merktj det de stofzuiger
gaar neet aan steit. Den kintj gai baiter tege
May zegge det ze de buurman efkes moot goan hole.

Den inbraiker

Steltj euch veur, gai hubtj ut hoes koompliëët
verbouwdj, zeetj pas getrouwdj mer gai kintj
op einen daag eur eige hut neet in oomdet de
vrouw de sleutel van de veurdeur met heet.

Den hubdjer geluk as de bouwvakker dai de zaak
heet verbouwdj nog steeds eine sleutel heet.

Steltj euch veur, gai kriegtj dai sleutel truk
mer dai paistj neet. Gai zeetj as de doeëd veur
inbraikers en zeetj gedwoonge oom ein ruutje aan
de achterdeur kepot te houwe oom in eur eige
hoes binne te kome.

Den hubdjer geluk detjer binne zeetj gekome soonger
det anger minse of de plies gezeen hubbe det gai
doa met bezig woortj.

Mer wie mootj gai euch den veule as de vrouw truk
kumtj en lietj zeen det de sleutel waal paistj
en det gai waal binne haadj gekoontj. Jè?
Den zoeëtj gai toch auch tege Loes zegge det
ze det tege nemes moos vertelle, of neet dan?